

Sr. Alcalde-Presidente
Concello de Vilar de Santos

Asunto: **Comunicación de situación de risco en relación á influenza aviaria en aves.**

Estimado Alcalde-Presidente:

O 15 de maio de 2023 desde a Dirección Xeral de Gandaría, Agricultura e Industrias Agroalimentarias enviouse unha comunicación en relación co asunto de referencia na que se informaba sobre a diminución do risco de aparición de influenza aviaria de alta patoxenicidade (IAAP) no noso territorio. Naquela ocasión, debido á diminución significativa deste risco, deixáronse de aplicar certas prohibicións ata entón en vigor, tomadas dacordo coa Orden APA/2442/2006, de 27 de xullo, pola que se establecen medidas específicas de protección en relación coa IAAP.

A citada Orden establece unha serie de medidas de protección fronte a influenza aviaria, medidas que varían en función da zona xeográfica tendo en conta unha serie de factores de risco. Así, establece zonas de especial risco (ZER) e zonas de especial vixilancia (ZEV).

O pasado día 16 de xaneiro o Ministerio de Agricultura, Pesca e Alimentación (MAPA) elevou o nivel de risco de influenza aviaria en España a alto debido ao aumento de casos, tanto en aves domésticas como silvestres, en diversos países de Europa (incluídos Francia e Portugal), aos movementos migratorios de aves silvestres de risco desde zonas afectadas e á baixada das temperaturas (que facilita a persistencia do virus no medio). Consecuencia de este aumento do risco é a adopción de medidas de mitigación, previstas na Orden APA/2442/2006, que **entran en vigor o 20 de xaneiro**, e que aínda que afectan en especial aos concellos das zonas ZER, con respecto aos concellos **situados en zonas ZEV, como é o caso do concello do que é vostede Alcalde-Presidente**, se establece a **prohibición das concentracións de aves de calquera tipo**, comerciais ou non (exhibicións, concursos...), tanto de aves de curral como doutras aves distintas a estas (p. ex. aves ornamentais ou similares).

Os concellos incluídos na zona ZEV son: Cariño, Dumbría, Mazaricos, Ortigueira, Porto do Son, Rianxo, Ribeira, Vimianzo e Zas na provincia de A Coruña; Ribadeo e Trabada na provincia de Lugo; Porqueira, Rairiz de Veiga, Sandiás, Vilar de Santos e Xinzo de Limia na provincia de Ourense; e A Guarda, Marín, Meis, Moaña, Poio, Pontevedra, Redondela, O Rosal, Soutomaior, Tomiño, Tui, Vilaboa e Vilagarcía de Arousa na provincia de Pontevedra.

CONSELLERÍA DO MEDIO RURAL
Dirección Xeral de Gandaría, Agricultura e Industrias Agroalimentarias
Edificio administrativo núm. 4 de San Caetano, 2ª planta
15781 Santiago de Compostela
T. +34 981 544 777 /+34 881 999 070
mediorural.dxgaia@xunta.gal
mediorural.xunta.gal





Aínda que a mencionada prohibición de concentración de aves é a única medida obrigatoria, como información complementaria recordamos as seguintes recomendacións:

- As persoas relacionadas con granxas avícolas comerciais que posúan tamén unha explotación avícola de tipo curral familiar, deben evitar ter contacto con aves dunha e outra explotación sen previamente tomar as axeitadas medidas de bioseguridade (lavado de roupa, lavado de mans...), especialmente se as aves do galiñeiro familiar teñen posibilidade de contactar con aves silvestres.
- As persoas titulares ou traballadoras en explotacións ou titulares de currais familiares de calquera tipo, no caso de realizar actividade cinexética de caza menor de aves, deben manter as adecuadas prácticas de bioseguridade unha vez finalizada a actividade cinexética, procurando no entrar en contacto coas aves domésticas da súa propiedade.

En relación á obriga para as persoas titulares de currais familiares de autoconsumo de inscribir o seu curral no Rexistro de Explotacións Avícolas da Consellería do Medio Rural, compre lembrar que a única finalidade deste rexistro é ter constancia da existencia do curral, como información de interese nunha situación de emerxencia sanitaria por influenza aviaria no territorio galego.

O rexistro pode realizarse por diversas vías:

- Na sede electrónica da Xunta de Galicia (<https://sede.xunta.gal/portada>), cubrindo o formulario MR 501A – Inscripción no rexistro de explotacións avícolas non comerciais. Xúntase modelo para o seu coñecemento e uso se o consideran. (<https://sede.xunta.gal/detalle-procedemento?codtram=MR501A&ano=2015&numpub=1&lang=gl>)
- Nas Oficinas Rurais (OR) da Consellería do Medio Rural. <https://www.xunta.gal/servizos-no-mapa>
- Por calquera dos sistemas habilitados pola Lei 39/2015, do 1 de outubro, do procedemento administrativo común das administracións públicas.

Dadas as características desta enfermidade, cunha alta capacidade de difusión entre as aves, e as graves repercusións económicas que a súa presenza pode causar ao sector avícola, é moi importante a detección precoz dunha sospeita desta enfermidade, polo que calquera sospeita de influenza aviaria debe ser comunicada de inmediato aos Servizos Veterinarios Oficiais da Consellería do Medio Rural, directamente ou, de existir, a través do veterinario da explotación. Igualmente débese comunicar calquera caso de sospeita en aves silvestres.

Finalmente, é moi importante trasladar aos cidadáns que o serotipo do virus IAAP circulante actualmente é o H5N1, cunha elevada mortalidade entre as aves, pero **que presenta un potencial zoonótico (e dicir, de transmisibilidade ás persoas) insignificante.**

Prégolle que dea a maior difusión posible a esta información a todos os veciños e veciñas do seu concello polos medios dispoñibles que considere máis adecuados.

Agradecemos a súa colaboración. Reciba un cordial saúdo,





Santiago de Compostela, na data da sinatura electrónica

O director xeral de Gandaría, Agricultura e Industrias Agroalimentarias
Silvestre José Balseiros Guinarte

